

**I. DISPOSICIÓN XERAIS****CONSELLERÍA DE SANIDADE  
E SERVICIOS SOCIAIS**

*Decreto 77/2001, do 29 de marzo, sobre centros, servicios e establecementos sanitarios da Comunidade Autónoma de Galicia.*

O artigo 33, punto 1, do Estatuto de autonomía de Galicia (Lei orgánica 1/1983, do 6 de abril) atribúelle á Comunidade Autónoma galega o desenvolvemento legislativo e a execución da lexislación do Estado en materia de sanidade interior.

O Real decreto 1634/1980, do 31 de xullo, sobre transferencias da Administración do Estado á Xunta de Galicia en materia de traballo, industria, comercio, sanidade, cultura e pesca, no artigo 33, letra g), transfire á Xunta de Galicia o outorgamento da autorización oportuna para a creación, construción, modificación, adaptación ou supresión de centros, servicios e establecementos sanitarios de calquera clase e natureza, incluídos os balnearios e as entidades do seguro libre de asistencia médico-farmacéutica.

En uso das competencias atribuídas á Comunidade Autónoma de Galicia en materia de autorización de centros, servicios e establecementos sanitarios, desenvolveuse un conxunto de normativa composto polo Decreto 99/1984, do 7 de xuño, sobre centros, servicios e establecementos sanitarios, o Decreto 147/1984, do 13 de setembro, sobre autorización de centros, servicios e establecementos sanitarios, a Orde do 7 de novembro de 1984 pola que se regula o procedemento para solicita-la autorización dos centros, servicios e establecementos sanitarios e a Orde do 24 de setembro de 1986 pola que se fixan os requisitos e condicións necesarias para a autorización dos centros de asistencia hospitalaria na Comunidade Autónoma de Galicia.

O tempo transcorrido desde a súa aplicación e a experiencia acumulada recomendan a posta ó día desta normativa coa finalidade de plasmar todos aqueles cambios que a realidade e a práctica aconsellan, como son, entre outros, a consideración de centros, servicios e establecementos sanitarios de conformidade coas autorizacións outorgadas ata o momento actual e a incorporación de novas obrigas para eles que melloren a protección da saúde e a información dos usuarios.

En consecuencia, por proposta do conselleiro de Sanidade e Servicos Sociais, e logo de deliberación do Consello da Xunta de Galicia na súa reunión do día vintenove de marzo de dos mil un,

**DISPOÑO:****Artigo 1º**

Este decreto é de aplicación ós centros, servicios e establecementos sanitarios civís, públicos e privados, que se encontren situados no territorio da Comunidade Autónoma de Galicia.

**Artigo 2º**

Considéranse centros, servicios e establecementos sanitarios:

## 1. Centros hospitalarios.

2. Centros ou consultas de medicina xeral, de especialidades médicas, de odontoloxía/estomatoloxía, de enfermería, de podoloxía, de psicoloxía clínica, de fisioterapia e demais profesionais sanitarios.

3. Oficinas de farmacia, boticas anexas a oficinas de farmacia, servicios de farmacia, depósitos de medicamentos de uso humano, almacéns de distribución de medicamentos de uso humano e unidades de dosificación de medicamentos.

4. Establecementos de óptica.

5. Establecementos de ortopedia.

6. Centros de transfusión, bancos e depósitos de sangue.

7. Bancos de tecidos.

8. Laboratorios clínicos.

9. Centros móbiles destinados á atención sanitaria.

10. Centros de tratamento de drogodependencias: unidades asistenciais de drogodependencias, unidades de desintoxicación hospitalaria, unidades de día e comunidades terapéuticas.

11. Centros de recoñecemento de aptitude para a obtención e renovación de permisos de armas e de conducir.

12. Centros de rehabilitación psicosocial e laboral para enfermos mentais crónicos.

13. Establecementos balnearios.

14. Todos aqueles que pola súa finalidade, medios ou técnicas empregadas, teñan carácter sanitario e/ou ós que se atribúa esa natureza por disposición legal ou regulamentaria.

**Artigo 3º**

1. Os centros, servicios e establecementos sanitarios obxecto deste decreto están suxeitos a:

a) Autorización previa de creación, así como das modificacións que respecto da súa estrutura e réxime inicial poidan establecerse.

b) Autorización de funcionamento que implicará a comprobación de que se cumpren as condicións e requisitos establecidos, comprobación que se acreditará mediante acta de inspección.

c) Autorización previa para a realización de actividades sanitarias específicas que a normativa así o esixa.

d) Control, inspección e avaliación das súas actividades, organización e funcionamento pola autoridade sanitaria.

2. A Consellería de Sanidade e Servicos Sociais procederá á inscrición de oficio no rexistro de centros, servicios e establecementos sanitarios, de todos aqueles ós que se conceda a autorización de funcionamento.

3. A autorización de funcionamento será requisito indispensable para:

-Inicia-lo exercicio das actividades sanitarias.

-Establecer concertos ou convenios coa Administración sanitaria.

-Obte-la autorización para actividades sanitarias específicas, se é o caso.

4. O procedemento para solicita-las autorizacións establecerase por orde da Consellería de Sanidade e Servicios Sociais.

#### Artigo 4º

Con independencia doutros deberes, os centros, servizos e establecementos sanitarios teñen as seguintes obrigas:

a) Comunicar previamente o seu peche, con independencia de que se establezan réximes temporais e excepciónais de funcionamento cando a protección da saúde da poboación o requira.

b) O cumprimento dos requisitos técnicos e condicións mínimas establecidos con carácter xeral ou específico para o seu correcto funcionamento.

c) A adaptación da súa estrutura, organización e funcionamento ó establecido, se é o caso, para cada clase ou tipo de centro, servizo ou establecemento sanitario.

d) Proporciona-la información solicitada pola Administración sanitaria.

e) Manter actualizada e exposta ó público unha relación de servizos sanitarios autorizados en función da titulación dos profesionais sanitarios.

f) Garantir, se é o caso, a constancia documental, durante un mínimo de cinco anos, da atención sanitaria prestada a cada usuario, así como a confidencialidade da devandita documentación.

g) Garanti-lo cumprimento dos dereitos dos usuarios que lles sexan de aplicación, recollidos no artigo 10 da Lei 14/1986, do 25 de abril, xeral de sanidade.

h) Ter á disposición dos usuarios follas de reclamacións que se axusten ó modelo oficial establecido pola consellería competente en materia de consumo, así como carteis anunciadores da súa existencia.

i) A identificación do persoal do centro, servizo ou establecemento sanitario que deberá exhibir en lugar visible da súa indumentaria.

j) Ter designado un director que asuma a responsabilidade do centro, servizo ou establecemento sanitario.

k) O cumprimento das obrigas derivadas dos principios de coordinación, solidariedade e integración sanitaria en caso de emerxencia e perigo para a saúde.

#### Artigo 5º

Correspóndelle á Consellería de Sanidade e Servizos Sociais:

a) Determina-los períodos de vixencia das autorizacións concedidas en función do centro, servizo e establecemento sanitario.

b) A clausura ou peche dos centros, servizos e establecementos sanitarios que non contén coas previas autorizacións preceptivas ou a suspensión do seu funcionamento mentres non reparen os defectos ou se cumplan os requisitos esixidos, sen carácter de sanción de conformidade co disposto no artigo 37 da Lei 14/1986, do 25 de abril, xeral de sanidade.

c) Adopta-las medidas preventivas que coide perigosas e sanitariamente xustificadas en caso de que

exista ou se sospeite razoablemente a existencia dun risco para a saúde.

d) Adopta-las medidas necesarias para a debida ordenación, rexistro e control sanitario dos centros, servizos e establecementos sanitarios.

e) A revogación motivada das autorizacións concedidas.

f) Rexistra-los centros, servizos e establecementos sanitarios ós que se lles conceda a autorización de funcionamento.

#### Artigo 6º

1. Os centros, servizos e establecementos sanitarios incluídos no ámbito de aplicación do presente decreto están sometidos ó réxime sancionador establecido na Lei 14/1986, do 25 de abril, xeral de sanidade, así como, se é o caso, naquelas outras disposicións que en función da súa tipoloxía ou materia de que se trate sexan de aplicación.

2. O procedemento sancionador, excepto ás oficinas de farmacia, será incoado polo delegado provincial correspondente e axustarase na súa tramitación ó disposto na Lei 30/1992, do 26 de novembro, de réxime xurídico das administracións públicas e do procedemento administrativo común, modificada pola Lei 4/1999, do 13 de xaneiro, e no Real decreto 1398/1993, do 4 de agosto, polo que se aproba o Regulamento do procedemento para o exercicio da potestade sancionadora.

3. Os órganos competentes para a imposición de sancións serán:

a) O delegado provincial correspondente da Consellería de Sanidade e Servizos Sociais para a imposición de sancións en contía non superior a cincocentas mil pesetas (500.000 pesetas).

b) O secretario xeral da Consellería de Sanidade e Servizos Sociais para a imposición de sancións en contía comprendida entre cincocentas mil unha pesetas (500.001 pesetas) e dous millóns de pesetas (2.000.000 de pesetas).

c) O conselleiro de Sanidade e Servizos Sociais para a imposición de sancións en contía comprendida entre dous millóns unha pesetas (2.000.001 pesetas) e dous millóns cincocentas mil pesetas (2.500.000 pesetas).

d) O Consello da Xunta de Galicia para os acordos de peche temporal do centro, servizo ou establecemento sanitario e a imposición de sancións en contía igual ou superior a dous millóns cincocentas mil unha pesetas (2.500.001 pesetas).

#### *Disposición derogatoria*

Quedan derogados o Decreto 99/1984, do 7 de xuño, sobre centros, servizos e establecementos sanitarios, o Decreto 147/1984, do 13 de setembro sobre autorización de centros, servizos e establecementos sanitarios, a Orde do 7 de novembro de 1984, pola que se regula o procedemento para solicita-la autorización dos centros, servizos e establecementos sanitarios e, en particular, o artigo 18 do Decreto 198/1994, do 16 de xuño, polo que se establece a estrutura orgánica da Consellería de Sanidade e Servizos Sociais, no que se refire á comprobación posterior do cumprimento das condicións e requisitos

exixidos para a autorización de apertura e posta en funcionamento, así como para a súa acreditación, se procede.

Así mesmo, quedan derogadas cantas disposicións de igual ou inferior rango contradigan o disposto neste decreto.

#### *Disposicións derradeiras*

Primeira.-A Consellería de Sanidade e Servicos Sociais dictará as normas e adoptará as medidas oportunas para o desenvolvemento e aplicación do establecido neste decreto.

Segunda.-O presente decreto entrará en vigor ó mes da súa publicación no *Diario Oficial de Galicia*.

Santiago de Compostela, vintenove de marzo de dous mil un.

Manuel Fraga Iribarne  
Presidente

José M<sup>a</sup> Hernández Cochón  
Conselleiro de Sanidade e Servicos Sociais

*Orde do 30 de marzo de 2001 pola que se regulan prestacións por desprazamento previstas no artigo 12 do Decreto 42/1998, do 15 de xaneiro.*

O Real decreto 63/1995, do 20 de xaneiro, sobre ordenación de prestacións do Sistema Nacional de Saúde, en concordancia cos principios básicos establecidos na Lei xeral de sanidade, regula as prestacións do sistema baixo o principio de igualdade e contempla entre as prestacións complementarias obrigatorias o transporte sanitario, entendendo como tal o traslado de enfermos ou accidentados en vehículos especialmente acondicionados para o efecto.

O Decreto 42/1998, do 15 de xaneiro, que regula o transporte sanitario na Comunidade Autónoma de Galicia, establece no seu artigo 12 os traslados que non se consideran prestacións sanitarias obrigatorias, ben que prevé que os gastos ocasionados polos ditos traslados poderán ser asumidos polo Servicio Galego de Saúde, sempre que concorran circunstancias que así o aconsellen e exista crédito orzamentario dispoñible.

Esta prestación vense concedendo actualmente na Comunidade Autónoma de Galicia, pero cómpre establecela de xeito uniforme na procura dun sistema máis axeitado para o usuario.

En consecuencia, de acordo coas facultades que me confiren os artigos 34.6º e 38 da Lei 1/1983, do 22 de febreiro, reguladora da Xunta e do seu presidente, reformada pola Lei 11/1988, do 20 de outubro,

#### *DISPOÑO:*

##### Artigo 1º

As prestacións previstas no artigo 12 do Decreto 42/1998 satisfaranse, nas condicións que se regulan na presente orde, ós pacientes que teñen cobertura polo Servicio Galego de Saúde que se despracen con fins asistenciais e non precisen usar transporte sanitario.

##### Artigo 2º

A necesidade do desprazamento será indicada polo facultativo responsable do paciente ou ben pola Inspección de Servicos Sanitarios cando concorran circunstancias de carácter asistencial que así o aconsellen.

##### Artigo 3º

Dentro da mesma provincia consideraranse prestacións por desprazamento as que teñan a súa causa en:

a) Tratamentos de diálise, rehabilitación, quimioterapia e radioterapia.

b) Outros tipos de tratamentos que precisen realizar un número de desprazamentos igual ou superior a 8 viaxes en períodos de 30 días.

##### Artigo 4º

En ningún caso se aboarán os desprazamentos que se realicen dentro do mesmo municipio, sexa de orixe ou de destino.

##### Artigo 5º

As prestacións por desprazamentos fóra da provincia aboaranse sempre que se autoricen previamente mediante orde de asistencia ou calquera outro procedemento regulamentario que se estableza. Non obstante, cando o desprazamento se efectúe por solicitude e por iniciativa do interesado, os custos serán ó seu cargo.

##### Artigo 6º.-Contía das prestacións.

1. En desprazamentos na comunidade autónoma, provinciais ou interprovinciais, aboarase unha contía fixa de 20 pesetas por quilómetro en viaxe de ida e volta desde o lugar de residencia (no medio rural tomarase como referencia a parroquia) ata a localidade onde se reciba a asistencia, con independencia do medio de transporte utilizado e da necesidade ou non de acompañante.

2. Nos desprazamentos fóra da Comunidade Autónoma aboarase a contía correspondente a un billete de ida e volta en autobús ou tren desde a residencia do paciente ata a localidade de destino. Excepcionalmente, cando as condicións clínicas así o aconsellen, poderá autorizarse o desprazamento en avión.

Aboarase o desprazamento do acompañante no caso de menores de 18 anos e daqueles outros pacientes que por razóns clínicas o precisen.

Cando o usuario modifique o medio ou as condicións de transporte autorizado, aboarase a contía correspondente ó medio autorizado pola Inspección Médica.

Se o desprazamento se efectúa en medios propios, aboarase a contía correspondente a un billete de ida e volta no medio ordinario de transporte dispoñible, con independencia da necesidade ou non de acompañante.

3. Non se poderán xerar aboamentos por outros conceptos.

##### Artigo 7º.-Procedemento.

1. A solicitude será presentada polo interesado ou os seus representantes legais no modelo de solicitude de prestación sanitaria P.8, na Dirección Provincial do Sergas correspondente á súa residencia habitual ou en calquera dos rexistros previstos no artigo 38.4º